

Kembalikan kegemilangan Tasik Chini

[Asrol Awang](#) - Jun 14, 2021 @ 1:16pm

bhnews@bh.com.my



Tasik Chini. Foto fail NSTP

KUANTAN: Kerajaan Pahang diminta mengambil langkah perlu untuk mengembalikan semula kegemilangan Tasik Chini sebagai satu kawasan pelancongan dan legenda ternama di negeri ini.

Presiden Majlis Belia Negeri Pahang (MBNP), Mohd Izzat Afifi Abd Hamid, berkata langkah itu sekali gus memberi sumber pendapatan kepada rakyat tempatan, khususnya masyarakat Orang Asli di Tasik Chini.

Katanya, dengan status tapak rizab biosfera Pertubuhan Pendidikan, Saintifik dan Kebudayaan Pertubuhan Bangsa-Bangsa Bersatu (UNESCO), Taman Negeri Tasik Chini seharusnya diangkat sebagai produk pelancongan bertaraf antarabangsa.

"Ia sekali gus setaraf dengan tapak biofера UNESCO yang lainnya di seluruh dunia.

"Oleh itu, selaku pergerakan yang mewakili suara anak muda, MBNP sedia bersama kerajaan negeri dalam usaha menjaga kelestarian Tasik Chini dan tempat lain untuk generasi akan datang dan kebaikan kita bersama," katanya dalam kenyataan hari ini.

Mohd Izzat berkata, komitmen kerajaan negeri mewartakan Taman Negeri Tasik Chini sebagai Hutan Simpan Chini adalah bukti keprihatinan kepada pemeliharaan dan pemuliharaan alam sekitar di negeri ini.

Katanya, MBNP percaya komitmen kerajaan negeri untuk mewartakan Taman Negeri Tasik Chini seluas 4,600 hektar sebagai Hutan Simpan Chini.

"Tiada kelulusan baharu diberikan untuk operasi perlombongan seperti diputuskan oleh Majlis Mesyuarat Kerajaan (MMK) pada 13 Mac 2020 adalah manifestasi keprihatinan serta kepedulian kerajaan negeri kepada pemeliharaan dan pemuliharaan alam sekitar dalam negeri ini," katanya.

Bagi menjaga dan melindungi ekosistem, flora dan fauna serta masyarakat setempat, beliau berkata, MBNP menggesa kerajaan negeri bertegas kepada semua pelombong supaya mematuhi prosedur operasi standard (SOP) yang ditetapkan.

Katanya, ini berikutan tular di media sosial berkaitan kerosakan Tasik Chini akibat aktiviti perlombongan dan banyak pihak mengecam kerajaan negeri berkaitan isu itu.

"Aktiviti perlombongan bukan perkara baharu dan aktiviti ini sudah berlaku sekian lama sejak dahulu lagi.

"Sejarah lama sudah banyak membuktikan bahawa aktiviti perlombongan ini menjadi satu keperluan untuk membangunkan sesbuah tempat. Ini kerana di bumi Pahang memang kaya dengan hasil bumi dan sumber mineral.

"Namun begitu, hasil bumi dan sumber mineral perlu diurus dengan baik agar tidak menjejaskan alam sekitar," katanya.